

مسرحية

# إتس مورنينج

تأليف هاني مهران

الزمن : الزمن الحالي 2015 إلى 2030

المكان : المقابر

الشخصية : حارس المقابر ( التربي )

المكان الذى تدور فيه أحداث المسرحية

\_ المكان عبارة عن مقابر فى حوش كبير

هناك أكثر من شاهد تتوزع بشكل يتيح للحركة المسرحية حرية التعبير والتصرف ولكن هناك شواهد (مقابر) أساسية وهى : شاهد يمين المسرح من الأمام على مقدمة المسرح (الأفانسيه) ، شاهد فى الجهة المقابلة على يسار المسرح

وشاهد (مقبرة) رئيسى فى أعلى وسط المسرح وهناك زرع صبار متفرق بجوار كل شاهد مقبرة كما يظهر السور فى الخلفية به بعض الكسور والهدم ويظهر الطوب الأحمر من لون السور

كما يوجد بوسط السور مكان للسلويت يظهر فيه الخيالات والعفاريت وشكل تجريدى لأى لوكيشن مختلف قد يستخدمه المخرج أثناء تقليد التربى للأموات

ويجب أن يكون جزء من السور ولا يلاحظ إختلافه عن السور إلا عند إستخدامه فقط فى المشاهد التى يستخدم فيها بؤر إضاءة

يوجد سلم فى نهاية المسرح يستخدم للنزول داخل المقابر ..

( موسيقى رعب )

تفتح الإضاءة بشكل تدريجى وبؤر على شواهد المقابر ونلاحظ خيالات عفاريت تجرى من السلويت

## اللوحة الأولى

( بعد لحظات )

(يدخل التربي (حارس المقابر ) يرتدى جلباب وكالسون \_رجل فى أواخر  
الأربعينات لكن يظهر عليه العجز و الهم .. فى حالة إستيقاظ من النوم )

التربي : (يتأوب ) ياااااااااااه .. (مخاطبا المقابر ) .. صباح الخير ياللى سبقتونا  
لدنيا أحسن ..أنتم السابقون ونحن اللاحقون .. خليكم مستريحين كدة .. وإحنا طالع  
عين اللى خلفونا

(يشعر بالشمس فى عيونه )

التربي : إيه ده ؟ هو برده الشمس طلعت النهاردة

( يخاطب الشمس ) إنتى مابتز هقيش .. كل يوم .. كل يوم كدة .. مافيش مرة  
تاخذى أجازة ولا حتى بدل راحة

عارفة .. إنتى بتفكرينى بنفسى أيام شبابى .. كنت أحب أصحى كل يوم أروح  
الشغل .. كل يوم كل يوم كل يوم كدة .. لحد ما زهقت وعرفت إن مافيش فائدة ..  
إنما لما إشتغلت هنا .. بقت كل الأيام شبه بعضها .. حتى لو نمت 3 أيام ماحدش  
هيحس بفرق ولا أنا هحس إن فيه حاجة إتغيرت ..

(يجلس على الأرض )

الوحدة بتخلى الواحد زى البيت الوقف .. لا حد بيسكنه ولا بيفيد حد ولا ليه أى  
لازمة فى الحياة ..  
( يقف غاضبا )

وبعدين أنا بكلمك ليه ؟ .. هو أنا مجنون عشان أكلم الشمس .. أنا أروح أغسل وشى وأدور على حاجة أكلها .. وبالمرة أصبح على الكولدير الخربان اللي قدام باب الترب

### ( يخاطب الشمس مرة أخرى )

التربى : أصله صاحبي .. بقاله هنا 16 سنة .. من ساعة ما جيت هنا وهو مانزلش نقطة مايه واحدة .. ولا حد فكر يشرب منه .. بحس إنه صديقي الوحيد الأنتم

### ( يتدارك إنه فى حالة غياب عن الوعى )

التربى : واضح إن حنة الحشيش اللي لقيتها إمبارح وشربتها حنة كفاءة .. آخر حلاوة ..

### ( يخاطب الأموات )

مش عارف أنا بتجيبوا الحشيش منين .. مين المدعى\* ( الديلر ) اللي بتستقضوا منه .. تلاقىكم قاعدين متنغنين وآخر فلة .. إنما إحنا فى غم وقرف ومشاكل وبلاوى كل يوم .. إنتم عايشين مع كل الناس الطيبة بتاعة زمان .. أيام الخير .. إنما إحنا ضايعين .. ورغم إنى بعدت عن الناس وقرفهم لكن برده تحس إنك بتتنفس قرف ورخامة ونطاعة وقلة ضمير

### ( يضبط مكان الزرع وينفضه من التراب ويمسح المقابر )

التربى : هنا أحلى مكان .. عارف ياض يا ميت إنت وهو وهى .. رغم حركاتكم النص كم وشغل العفاريات بتاعكم .. لكن خلاص أخذت على كدة .. حتى الواد العفريت الصغير اللي لقيته عايز يهرب من على سور الترب ومسكته 3 مرات .. رغم إنه تعبني لكن خلاص خدت على كدة ..

( يذهب لخلف مقبرة يأتى ب " جوزة " ويجلس ليشرب منها \_ ويضع فيها حشيش \_ ويكمل حديث مع الأموات \_ نسمع صوت كركرة الجوزة بشكل واضح )

(موسيقى وتظهر خيالات فى الخلفية وفى كل مكان يرقصوا ويجروا فى كل اتجاه )

**التربى :** ومرة طلعلى عفريت وحاول يرخم عليا .. رحت مسكته .. ظبتطه وإديته كشافين على وشه على كام شلوت .. قعد بقى بيرطم ويقولى أنا هوريك .. وحياة أمى مش عارف هعمل إيه ..

**( يقف وكأنه بالفعل يخاطب عفريت )**

**التربى :** يالا ياوض من هنا .. بقى عايز تهرب من الترب وأسبيك تروح تقرف الناس الغلابة عن ما هى قرفانة .. دا أنا لو مسكتك تانى هنفخك .. أنا بس أسيب أم الدنيا دى .. وأجيلكم .. وأشوف النعيم وأقابل الناس الطيبين

**\_ بعد لحظات \_**

**( نسمع صوت من الخارج .. له صدى .. عفريت )**

**الصوت :** عايز تشوف الخير وتجرب النعيم .. وتقابل الناس الطيبين

**التربى :** وحد يكره ؟! .. فين ؟

**الصوت:** تعالى هنا ..

**( يقف التربى ويبحث عن الصوت ويقترب من السلم الخلفى للمقابر )**

**الصوت :** أيوة هنا .. تعالى .. هنا النعيم كله ..

**( يضع التربى قدم للنزول )**

**الصوت :** بس إستنى .. عشان تروح للنعيم والخير .. وتقابل الناس الطيبين لازم تقلع هدومك

**التربى :** لازم موضوع الهدوم ده ؟

**الصوت:** طبعا .. عشان تتجرد من متاع الدنيا

**التربى :** طالما هقابل الناس الطيبين وأشوف النعيم .. مافيش مشكلة .. نقلع

**(يقوم التربى بخلع الجلابية والصدى \_ ويأخذ ال "جوزة" \_ ويعود لمكان السلم )**

الصوت: إدخل برجلك اليمين بقى  
( ينزل التربي للسلم وعند إختفائه من المسرح نسمع صوت ضرب )

التربي : آآآاه .. آآآآاه .. آآآآى

الصوت: عشان تضربنى كشافين على عيني .. أنا جبتلك أصحابي يوضّبوك  
(نسمع صوت الضرب ثم موسيقى)

إظلام  
تمت بحمد الله

للتواصل

المؤلف

هانى عبدالرحمن مهران عبدالحميد

(هانى مهران )

كاتب ومخرج مسرحى

شاعر عامية

للتواصل :

[Hany\\_mahran@hotmail.com](mailto:Hany_mahran@hotmail.com)

[www.facebook.com/hany.mahran.7](http://www.facebook.com/hany.mahran.7)

ت / 01228951987 / 01116206053